

tum, aut saltem non omnes, qui Brutii essent, Lictores erant. Et si non omnes, cur non aliis adscribitur actio illa, qui aliarum nationum erant. Similiter si milites, præter Lictores, aut si milites cum licitoribus, nefario scelere astiterunt; aut nulli erant Brutii inter milites illos, aut non omnes Brutii erant. Et si non omnes, quare solos Brutios administratos facinoris volunt?

Attamen hæc afferre non pigeat, varias Scriptorum opiniones, de natione Tortorum Christi, sive milites illi fuerint, sive Lictores; & præcipue Centurionis illius, qui militibus præcedebat. Sancti Patres plures, Scriptores autem ecclesiastici plurimi, scribunt, Lictores, qui Christum vel flagellarunt, vel cruci affixerunt, Romanos fuisse. Apud Maldonatum in Matth. 27. num. 47. citantur S. Hieronymus, Beda, Euthimius &c. Apud Cornelium a Lapide semper Romanos milites invenimus; & non diversimode apud Dionysium Carthusianum in Matth. ar. 42. & 44. Gretserum, Joannem Tamayum, in martyrologio Hispano tom. 5. fol. 336. Sive ergo milites, sive lictores, tortores fuerint, sive utrique; æque apud Scriptores istos, Romanos fuisse,prehendimus.

Lucius Dexter, vel quisquis alius sit Auctor operis illius, quod Lucii nomen in fronte ostendit, in chronico ad annum Christi 34. Centurionem, quem C. Oppium appellat; vocat quoque Romanum civem, quem etiam nativitate Hispanum fuisse, scribit. Ex quo inferimus, quod fortassis milites illi, sive lictores, Romani dicebantur, quia missi in provinciam a Romano Imperatore fuerant; vel quia in Romano Exercitu erant; vel quia Romanæ Civitatis honore potiebantur. En Lucii verba: *Floret per id tempus in Hispania*